

## Naqqiut

### Ulloq 11. April 2016 ullulerneqarsimasoq taarserpaa. Qulequtaa iluarsineqarpoq.

**Aktiaateqarluni piginneqataassuteqarlunilu ingerlatseqatigiiffiit pillugit inatsisip (ingerlatseqatigiiffiit pillugit inatsisip) atuutilernissaa pillugu Kalaallit Nunaannut peqqussummut oqaaseqaatissamut Inatsisartut aalajangiiffigisassaattut siunnersuut.** (Inuussutissarsiornermut, Suliffeqarnermut, Niuernermit Nunanullu Allanut Naalakkersuisoq)

#### **Saqqummiussissut**

(Inuussutissarsiornermut, Suliffeqarnermut, Niuernermit Nunanullu Allanut Naalakkersuisoq)

#### **Siullermeerneqarnera**

Aalajangiiffigisassat siunnersuummi siunertaavoq danskit-kalaallit suleqatigiissitaliaannit, Kalaallit Nunaanni inuussutissarsiornerup ineriartortinneqarnerata aammalu niuernermit tunngaveqartumik aningaasaliisarnit siuarsarneqarnissaannut siunnersuusiornissaq siunertaralugu, 2013-imi pilersinneqartumit inassuteqaatit malitseqartinneqarnissaa.

2015-imi februaarimi suleqatigiissitaliaq nalunaarusiamik suliaqarpoq, tassani tikkuarneqarluni inuussutissarsiornermut inatsisinik ingerlaavartumik nutarterisarnissaq pisariaqartinneqartoq, tassami taanna immikkoortuni pingaaruteqartuni arlalinni danskit aalajangiisinnatitaaffeqarfigaat aammalu annertoorujussuarmik EU-mi inatsisineersuusarluni.

Inuussutissarsiornermut, ingerlatseqatigiiffinnut naatsorsuuserinermullu suliassaqaarfiit iluanni Naalagaaffeqatigiinneq akimorlugu maleruagassat assigiit aallaavigalugit sulisoqarsinnaappat, tamanna danskit, nunanit allamiut kalaallillu suliffeqarfiini allaffissornikkut oqinnerusumik ingerlatsisinnalernermik kinguneqarsinnaassaaq. Tamatuma saniatigut suleqatigiissitaliaq isumaqarpoq, aningaasaliisartut suliffeqarfiillu nunanit allaneersut pilersissinnaanissaannut, Kalaallit Nunaanni inuussutissarsiornermut inatsisip ullutsinnut naleqquttuunissaa paasiuminartuunissaalu pisariaqartinneqartoq.

Suliffeqarfimmik pilersitsinissamik kajumissuseqalersitsinerup saniatigut, inuussutissarsiornermut inatsisit nutarterneqarneranni aaqqiissutissat digitalimik

nalunaarutiginnittarnermut tunngasut ammaanqassapput, tamatumalu Kalaallit Nunaanni suliffeqarfiit allaffissornikkut nammagassaat oqinnerulersissavai, taamaalillunilu niuernermi ingerlatassanut pingaarnernut isumalluutissanik pissarsisoqassalluni.

Ingerlatseqatigiiffinnut inatsit inatsisini arlalinni, Kalaallit Nunaanni inuussutissarsiornermut inatsisit nutarterneqarnissaannik siunertaqarfigineqartuni inatsisaavoq ataaseq aammalu inatsisip matuma atuutilernerani, inuussutissarsiornermut inatsisinik ingerlaavartumik nutarterineq aallartissaaq. Inatsisit allat inuussutissarsiortunut tunngatinneqartut, Kalaallit Nunaanni suliffeqarfinni siuariartortitsinissamik siunertaqarfiusut tassaapput aktiaatileqatigiiffiit piginneqatigiiffiillu pillugit inatsit, aningaasaateqarfiit inuussutissarsiornermik ingerlatsisut pillugit inatsit, ukiumoortumik naatsorsuutitut inatsit, naatsorsuutitut allattuisarnermut inatsit aammalu kukkunerisiuisartut naalagaaffimmit akuerisaasut nalunaarsorsimasullu pillugit inatsit.

Taamatut oqaaseqarlunga siunnersuut Inatsisartuni suliarineqassasoq inassutigaa.